



KEMENTERIAN PEMBANGUNAN WANITA,
KELUARGA DAN MASYARAKAT

SIARAN MEDIA

SUKARELAWAN PAWE SUMBANG BAKTI KEPADA MASYARAKAT

Kangar, 9 April – YB Datuk Seri Rina Mohd Harun, Menteri Pembangunan Wanita, Keluarga dan Masyarakat telah melancarkan Program *VolunteerISM@PAWE*: Bengkel Kemahiran Asas Kesukarelawanan pada hari ini melibatkan dua buah Pusat Khidmat Aktiviti Warga Emas (PAWE) di sekitar negeri Perlis.

YB Datuk Seri Rina semasa ucapannya berkata “Peratus warga emas yang melebihi umur 60 tahun ke atas dijangka terus meningkat dengan drastik dan akan mencapai 5.3 juta orang iaitu 15.3 peratus pada tahun 2030. Kerajaan menerusi KPWKM memberi perhatian khusus terhadap persediaan menghadapi negara tua menjelang 2030. Justeru agenda memperkasakan PAWE terus diberikan perhatian sewajarnya dengan penganjuran bengkel kemahiran sebegini.”

“Pelaksanaan program ini di PAWE akan dapat mengumpulkan warga emas yang masih aktif untuk menyumbang sekaligus mengisi kelompong rutin kehidupan mereka dengan mengambil semangat konsep pembelajaran sepanjang hayat. Ini akan dapat membuka ruang dan peluang kepada warga emas untuk terus berada dalam komuniti dan terus menyumbang pengalaman dan pengetahuan mereka kepada masyarakat sebagai salah satu konsep ‘perkongsian’ dan menerapkan nilai-nilai

kesukarelawanan yang tinggi dalam kalangan masyarakat”, tambah Datuk Seri Rina.

VolunteerISM @PAWE atau bengkel kesukarelawanan yang dilancarkan ini juga merupakan antara usaha KPWKM dalam memperkasakan dan mendayaupayakan platform warga emas yang berteraskan “*Community Based Organisation*” atau Organisasi Berasaskan Komuniti. Sepanjang bengkel ini, peserta dilatih untuk mengenal diri, memahami komuniti dan persekitaran serta cabaran-cabaran yang harus dihadapi dan cara untuk mengatasinya. Ilmu dan pemahaman ini akan dapat merangsang peserta untuk menyumbang bakti kepada masyarakat dengan lebih komited.

Dalam Belanjawan 2021, Kerajaan telah menaikkan bantuan kewangan tahunan pengendalian PAWE daripada RM33,330 kepada RM50,000 bagi melaksanakan program dan aktiviti PAWE selari dengan konsep warga emas aktif dan produktif. Malah pada tahun ini juga, sebanyak RM7.15 juta diperuntukkan bagi pengoperasian 143 PAWE di seluruh negara sebagai tanda komitmen Kerajaan dalam meningkatkan kualiti hidup warga emas.

Bengkel yang dilaksanakan selama tiga hari ini diharapkan dapat memberi kefahaman kepada peserta tentang hak-hak, peranan, tanggungjawab serta syarat-syarat dan persediaan yang diperlukan untuk menjadi sukarelawan yang efektif. Bengkel ini akan diteruskan lagi ke PAWE-PAWE di negeri-negeri lain mewakili zon-zon sepanjang tahun 2021.

Turut hadir semasa program ini ialah YB Puan Siti Berenee binti Yahaya, Exco Pembangunan Wanita, Keluarga dan Masyarakat Negeri Perlis, Dr. Maziah binti Che Yusoff, Ketua Setiausaha Kementerian Pembangunan

Wanita, Keluarga Dan Masyarakat, Dr. Fazni binti Mat Arifin, Pengarah ISM, Puan Fatimah Zuraidah Timbalan Ketua Pengarah (Operasi) Memangku Ketua Pengarah JKM, Tuan Mohammad Hazam binti Ismail, Pengarah JKM Negeri Perlis, Tuan Haji Azmi bin Abd. Karim, Pengarah JKM Negeri Kedah dan Tuan Shaballah bin Zainal, Pengarah JKM Negeri Pulau Pinang.

###

| | |
|--------------------|--|
| Disediakan oleh | Unit Komunikasi Korporat (UKK) Institut Sosial Malaysia (ISM) |
| No.Telefon | 03-7985 3333 |
| Tarikh dikeluarkan | 9 April 2021 |